

Comision Seyo Nacional pa Artesania a presenta plan y proyectonan na Minister Oduber



ORANJESTAD -- Diaranson Minister Otmar Oduber a haya un presentacion di e Comision Seyo Nacional pa Artesania cu ta wordo maneha pa Departamento di Cultura (DCA). E comision aki tin e certificacion oficial di Gobierno di Aruba Seyo Nacional pa Artesania.

Mester bisa cu e preparacion pa Seyo Nacional a cuminsa na 2010 pa medio di un investigacion y documentacion pa haci esaki posibel. Un comision a wordo crea cu ta consisti di diferente stakeholder importante pa por a logra e exito di Seyo. DCA como encargad di e proyecto bou guia di Vicky Arens ta prepara y promove artesanianan pa participa y pa forma parti di e proyecto aki cu tin metanan grandi su dilanti.

Durante e presentacion Vicky a mostra e importancia cada bes mas grandi cu productonan local y nan proceso di realisacion ta hayando rond mundo y con mas y mas bishitante ta pidi pa e artefactonan localmente produci. Tambe el a presenta con

tin peticionnan pa un centro cu ta promove, stimula y engrandece artesanianan.

Den e cuadro aki a presenta diferente plannan y a discuti hunto cu Minister Oduber riba diferente proyectonan y posibilidad nan cu tin pa engrandece e industria di artesanianan mas ainda den diferente parti di nos isla, teniendo semper na cuenta e importancia di ta produccionnan local y tambe habiendo e portanan pa exportacion di nos propio artesanianan.

Mirando e importancia cu Minister Otmar Oduber y Gabinete Mike Eman den su totalidad ta dunando na San Nicolas, caminda kier haci di dje e di dos capital turistico di Aruba, poniendo enfasis riba e aspecto cultural, diferente sugerencia y ideanan a wordo intercambia pa incorpora e parti importante aki di nos cultura, manera ta artesanianan den e desaroyo di pariba di nos isla.

Minister Otmar Oduber a keda hopi satisfecho cu e reunion/ presentacion y a muestra cu e ta sostene e plan y proyectonan di Seyo. □